

Heidelberg, 6. April 1580

Von Edo Hildericus

UB Basel, G I 26, Nr. 79.

S. D. Etsi clarissime vir ego tibi neque de facie, neque de nomine sum notus: tu tamen mihi, vt omnibus doctis viris, propter doctissima scripta tua, quae in lucem edidisti, es notissimus. Prima autem occasio mihi ad te scribendi haec data est. Iuuenis modestus, et eruditus Christophorus Wiesener, patritius in Prussia, istuc se confert vestrae clarissimae vrbis videndae caussa, et propter alia quaedam negocia priuata. Sperat hic iuuenis, se auxilio tuae humanitatis, et facilitatis quaedam istic monumenta spectatu digna visurum esse: idque se facilius impetraturum, si aliquid a me literarum ad te acciperet. Hoc parum scribendi officium ei denegare non potui, nec debui, cum annis aliquot ante meus fuerit discipulus, et secum circumferat fide digna testimonia honestatis et morum, et studiorum. Quare si quid in vestra clarissima vrbe spectatu dignum fuerit, quod sine curiositatis crimine spectare iuuenibus peregrinis licet: ad hoc spectandum vt ei pro tua summa humanitate adiumento sis, amanter, et reuerenter a te peto. Si quid erit, in quo intellexero me tibi, aut tuis aliquando vicissim gratificari posse: ad id me promptissimum habebis. Bene vale vir clarissime, Heidelbergae die 6 Aprilis, Anno Christi 1580.

Tui clarissimi nominis studiosiss[imus]
Edo Hildericus sacrae
theologiae doctor, ac
professor.